

四庫全書

集部

欽定四庫全書

鹿洲初集卷十九

廣州府知府藍鼎元撰

哀辭

閣部沈公哀辭

有序

康熙五十八年二月朔日

皇清通議大夫內閣學士兼禮部右侍郎前提督福建學政心齋沈公以疾卒于歸安之竹塢里第嗚呼哀哉

閩中紳士先後聞訃各就其郡所建立為公生祠者發喪鼎元因得從諸君子後哭公于漳之茗南書院臨三日成禮而退退而餘哀弗忘不自知涕泗之涔涔然實也憶公癸未歲由掌坊侍講來閩視學甄拔俊人以千數獨于小子鼎元謬加國士之知且命隨輶車校八郡三載從遊情同父子己丑以宮詹乞假重來三山鼎元星夜馳謁鼓棹送之武夷拜別于崇安郭外自是以後燕閩迴隔赫蹠之上時惠德音而顏色不可復見矣人

生知已難之又難鼎元正在穉騃性狂學陋公遽以遠
大相期許慇懃教誨皆不止為一身一世之業每中夜
激昂思欲有所樹立以慰公望迺草萊有懷莫展何
望經世遠猷以能如公之志不自度量思垂空文就正
白蘋紅蓼間釐訛定舛亦足表見一二揚公教澤于將
來不謂公之見背如此其速也嗚呼哀哉道路阻修奔
喪無力生不能副其望沒不能送其終視予猶子不得
猶父悠悠蒼天抱恨曷有極乎素旗述德泣下泉流土

壤無益于泰山知不足闡揚萬一亦聊陳其大槩寫余
小子哀思云爾乃再拜稽首而為辭曰

嗚呼夫子一代偉人生榮死哀名播乾坤家聲源遠吳
越所尊侈談世系恐掩其真

先皇辛卯降嶽生申弱冠偕兄同捷丙辰聯鑣金馬分
搜鳳麟已未人才萃于弟昆春坊厯掌啟沃儀宸

天子曰咨惟乃馨聞汝學既茂汝行更醇汝持玉尺視

學八閩惟清惟慎如朕詩云

上御製考試嘆詩
分賜各省學臣

公拜稽

首星馳日奔甫入閩關盟天告神一錢不取愛才如珍
鴻篇傑構翻閱夜分有劣在擯把卷酸辛冀野羣空幽
谷生春公之待士若子若孫欲加諸膝教誨諄諄士之
視公若萱若椿既喜舞蹈亦淚沾巾有閩以來無此學
臣清操第一巨眼殊倫還

朝報政僉曰忠純宮詹內閣晉秩承綸恩科禮闈掌試
衡文甲午三秋楚才復掄英雄入彀朝野懽欣泰山北
斗譽望日新佇宣白麻用秉國鈞忽焉勇退于菖之濱

林泉詩酒娛老忘貧坐席未煖

召起密雲築城浚湟保我黎民三載役休歸家十旬天
不慙遺大命遄臻嗚呼哀哉公昔離閩九郡謳思各建
書院設位立碑漳曰茗南舊在西池近嫌簡陋龍門是
移小山律萃危石爭奇名花古樹蔽芾紛披輪焉奐焉
佳景四時諸生每歲上壽于斯何期今日聚哭生祠為
公喪次易主當輶嗚呼哀哉憶公已丑乞假歸里睠念
閩人節遊建水山川增色童叟有喜僚史闐迎車騎成

市諸生雀躍親愛鮮比日尋名勝擁公授几浩歌浮白
談文舍矢欲去牽衣彌月不止解珮獻芹亦薪亦米千
人一心古未有此而今而後不可得矣號慟天涯奉公
拍紙嗚呼哀哉庚寅之歲花甲初周公時在籍覽揆于
秋閩中多士踰山涉流持幣張軸為公添籌庶常蔡子
自燕馳郵如期恰至公樂油油天南地北一室朋儔賦
詩百首搖嶽凌洲期公七十勝會重遊彼蒼蒼晉六九
彌留失聲相嚮慘淡林垵嗚呼哀哉公之密雲人思助

役謂茲重任匪廉能克九郡齊聲樹幟共白設醴醵金
日投千百紳士傾囊工商集腋樵子菜傭錙銖表赤羣
萃會城環呼榮戟乞疏代陳輸公土石中丞不可衆淚
泉滴雲集轅門跪朝而夕因茲入

告克底乃績方欣公還俄聞易簀典型遽謝摧肝裂膈
嗚呼哀哉公有二子聯翩登第文孫奮翼青雲自勵猶
子彙征茅茹並轡德聚一門業隆一世壽考令終諸福
畢備遺愛在人千秋弗替含笑九京何歎何恚惟予小

子有懷未遂平日思公恨無兩翅滿腔抑鬱彌天塞地
今日思公幽明路異望北拊膺心焉如刺追惟教澤宵
不能寐終當努力以成公志握管述芳垂之來裔嗚呼
哀哉

黃越甫哀辭

有序

康熙五十九年春王正月元日戊辰漳浦處士越甫黃
先生卒嗚呼哀哉先生諱元美字越甫居浦邑之高岑
先世以詩禮傳家有令望厥考長民先生學行冠一時

為薦紳名士所宗仰與先君交特厚先生生而卓犖長有文名受業先君為師徒中知己立身行事不謀而合先君最愛重之其性情品格在太丘叔度之間其文章韶令俊逸可行于世而名心早淡在蠱之上九其為詩工絕古體尤長有六朝風味韜光隱曜不輕以示人其持家有禮法門內雍雍穆穆罔越矩矱教子博通經籍先行誼而後科名其家雖甚貧胷懷浩蕩無寒猥局促之態見利不苟得而為人謀必極周視親朋憂患坎壈

怡愉歡樂不啻以身共之其識趣高朗臨事燭照舉天
下紛攘糾錯鬼蜮離奇可驚可愕之變態無不了了胸
中辨義利觀人品邪正決事機成敗指揮論列百不失
一使先生幡然用世必有可觀乃蹈河檀之遺跡追衡
泌之高風皮裏春秋汝南管籥羣賢影附若毛羽之宗
鳳麟不亦休哉正月元旦賀者在門先生正襟危坐瞋
然告終賓客衣冠須臾盡白自名公貴人市兒賤隸莫
不咨嗟痛惻揮涕失聲工匠趨蹌勞不受直斯可謂存

榮沒哀匹夫為善分量至此而極者也鼎元與先生既屬兩世昆弟之交又最知心莫逆忽覩此痛肝腸如割不揣荒陋投淚稽首而為之辭曰

麟士織簾君平賣卜槃阿碩人永矢弗告嗚呼先生高岑蟄伏泥塗勢利遐心金玉昔自妙年孝友嫻睦營葬祖墳千山繭足喪致乎哀養誠且肅文秀春華名澹蕉鹿作為詩歌駕潘追陸韜晦自珍如蘭在谷人中之龍雲中之鵠樂天知命歸真反璞宜躋遐齡皤皤名宿百

年方半物化迅速嗚呼哀哉先生有母白首在堂敬姜
晝夜涕泗汪汪父瑩則備而柩未康幼男弱女繞膝傍
徨婚嫁未了遽往何方嗚呼哀哉先生有子既賢且孝
讀書立品無忝而教伯也才能繼述有耀仲也醇謹克
家之肖叔子冠軍蜚聲學校四郎五郎資皆可造又有
賢孫濟濟佳妙加爾數年其興可料如何昊天弗俾瞻
眺嗚呼哀哉先生之存鉅公盈門唾咳珠璣舒嘯風雲
品題佳士口頰生春論事龜燭大惑解紛先生之沒閭

里酸辛元旦臨喪車馳馬奔貴者賄賂賤者服勤感及
工匠拭淚沾巾彷彿太丘芳躅未泯匹夫為善至此極
尊嗚呼哀哉元與先生通家昆弟兩世交情骨肉不啻
念我阨窮憂我家計勗我勲名規我經濟痛癢相關心
血相繫我愧不才蓬蒿困滯恐負所期中宵不寐豈虞
先生忽焉長逝月犯少微摧肝裂肺緬想芳型歷歷可
志憤亂不文執筆隕涕素旗誄德悲傷無既嗚呼哀哉
林元白先生哀辭

南詔詩人林元白先生以辛丑王春九日考終于教忠
第姻家猶子藍鼎元趨而哭之曰嗚呼先生死矣老成
遽凋典型長謝風雅道喪廣陵響絕宇宙間黯然可恨
事豈不痛哉先生忠烈子孫詞壇名宿以烟霞詩酒束
一生忠孝鬱勃雄浩峻嶒之氣投之所向隨境而安其
發為文章超宕俊逸有霽月光風入其胸次余嘗序其
詩以為得微之之神而兼樂天之致字曰元白實稱其
名先生亦以余文為有當於道凡所著述輒擊節玩味

歷久不忍置嗚呼可不謂知己與先生歿年八十有一
箕疇次九五者皆備所痛後生小子失所瞻依而余又
忝附姻婭之末兼有知己之感將從長君彥伯朝夕受
教言忽焉覲此傷心特甚乃刑牲設醴再拜陳詞匪忘
荒陋用寫余哀云爾為誄曰

自昔澳川地連東粵明割南鄉詔安是設詔安著姓惟
林最傑五都康美如瓜似瓠先生曾祖高第煥發祖忠
簡公西陲節鉞罵賊不屈剔膚副舌有死無降冰天淚

血厥考錦衣有父風烈誕育先生明聰俊哲學富縹緲
心操冰雪不驚時名不趨炎熱不入江湖不登魏闕浩
然存真敞屣若脫孝友廉讓至性肫結穆穆雍雍夷險
一節如松之蒼如蓮之潔一鄉善士欽茲大耋宜壽彭
聃兒撫莊列胡急修文與世遽別嗚呼哀哉先生少年
遭時變亂挈家避賊東奔西竄所至皆安寇不能犯數
居天城異景特擅清泉怪石詩酒留戀晚歲重遊謳吟
感嘆彼已荒烟此亦閃電嗚呼哀哉先生于詩直窮奧

妙聲情曠朗詞旨幽峭屈宋衙官鮑庾同調騷壇主盟
牛耳有耀將俾風雅盛行海嶠其集則存胡天不弔後
生小子將安則倣嗚呼哀哉先生于酒獨得豪致負抱
奇磊藉斯寫意日營糟邱呼朋共醉坐花對月浩歌揚
解庶幾淵明與江咨議劉伶畢卓呼為兄弟昔醉竟日
今醉竟世大夢不醒破笑為涕嗚呼哀哉先生室人實
賢且淑詩砭傷時先生示內詩云句不驚人語不奇山妻但恐我傷時使歸渾穆
客歲先驅夜臺獨宿顚望駕臨惟恐不速兼有好友九

原馳逐李君踐約蔡君酒熟

先生祭李丞相文云九原若遇蔡習孚為我告曰十

年後幸酌酒相待

先生此去朝朝宴樂惟憐孝子終天慟哭濟

濟蘭孫號呼躑躅余忝姻親方資追琢忽焉聞訃心傷
淚落濁醪一樽生芻一束珥筆傳芳素旗方幅嗚呼哀
哉

林母李太君哀辭

康熙五十八年五月二十六日戊戌太姻母文懿李太
君卒嗚呼哀哉太君吾邑侍御寶弓先生女也幼聰慧

能讀古詩樂府兩漢六朝三唐諸家耽筆墨有澹泊寧靜之致年十五歸林元白先生先生南詔世家曾祖莫凡公故明萬厯進士列官於朝祖忠簡公崇禎間以大中丞建節西陲遭李闖之亂罵賊不屈而死父錦衣公持喪還閩完葬事亦死于賊先生八歲而孤母楊夫人撫之居長泰之天城依舅氏也年二十八贅漳浦太君以天城隔遠不得奉侍姑嫜為憾迎楊夫人來家于浦竭誠孝養鄉里稱之甲寅閩變先生獲戾守將避而他

之太君百計脫浦邑奉姑復入天城同時避亂者多不
得謀生鶉結甑塵饑寒疾苦太君極力周恤賴以全活
者甚衆天城高踞山巔奇峯偉岸為武安第一名勝楊
夫人大父方伯鵬遙公所經營怪石清泉名花異木參
錯佈置于崇臺危閣天梯窈洞之間當春桃紅柳綠好
鳥送音同時婦女如入天台武陵不復知有亂離慨嘆
每聯袂遊觀以為娛樂太君獨齋居小樓足不踰閭闔
而是時侍御公為賊帥羈縻海澄督餉慘毒母氏在浦

未知安危太君涕泗交頤日夜焚香祝天願父母晏然
無恙未幾得釋越三年丁巳夢乃翁告曰寇且劇亟去
天城未幾天城陷殺掠鮮遺獨太君以先期奉姑還浦
不與其難人以為孝感所致云先生年近四十猶艱子
嗣太君為置側室未幾嫡庶皆舉子楊夫人晚得風疾
坐卧不離床太君日夕奉養恭敬益篤厯久無倦容辛
巳喪姑哀毀盡禮與先生拮据經營極力襄葬事先生
早歲學成名立以父祖忠貞隕難悲傷慘怛硯礪填胸

兼時際變遷荆榛塞路奔馳兵火之中靡有寧宇功名
世故視若浮雲日與二三知友賦詩酌酒一切牢騷慨
慷忠孝鬱勃感憤不平之氣皆于詩焉發之每客至則
太君潔壺觴腴饌先意承志隨其所宜惟慮先生詩
詞有傷時嫉俗之意婉轉勸導使歸和平憶先生示內
詩云句不驚人語不奇山妻但恐我傷時可知識得詩
中否細步偷來檢我詩則先生閨房之樂相得之懽于
此可想見矣今先生年方八十康寧未艾而太君尚少

五歲溘然長征嗚呼哀哉某與冢君彥伯締為婚姻犬
子雲龍太君之孫婿也今歲登潭府從蒙師受學太君
愛之如孫子方幸兒曹得承教誨忽焉遭此何能為情
不揣固陋再拜稽首而為之誄曰

猗歟太君湧川鍾秀延平裔孫隴西華胄迺祖孝廉家
傳忠厚父寶弓公持斧衣繡嘉濟廟中裡祀弗子誕育
掌珠聰明誰似既勤女紅亦習詩史四行兼全芳規備
美曰嬪于林增光南詔忠簡之穆錦衣之肖元白先生

詩名有耀案則齊眉吟則賡調吁嗟太君事姑純孝如
娒和諧親鄰則傲周窮恤乏感者懽叫賓至如歸酒旨
殽妙吁嗟太君大亂弗傷七歲隨父被圍清漳易子炊
骸十人九僵獨能不死餓以徜徉甲寅逃浦載道劍鏑
釵鈿可賂賊不能戕天城避兵四載安康一朝棄去冠
墜巖疆天之所佑德實克當廣嗣重祖側室是將趙姬
女宗真堪頡頏佳兒成立嫡庶相忘伯也才茂芹藻生
香仲也學篤辟雍上庠蘭孫濟濟出地新篁胡為太君

寶婺埋光驂鸞上漢散魄泉鄉嗚呼哀哉緬惟太君婦
道無闕奉養竭誠送終淚血歛憑其棺窆臨其穴馬鬣
雙封松楸揭揭從茲一去翁姑則悅承歡地下與世永
訣嗚呼哀哉吁嗟太君而今已矣其奈先生空房靜几
興來吟咏孰為仲紙語即驚人孰規孰喜入既傷心出
亦隕涕嗚呼哀哉昔柳下妻謚夫曰惠黔婁之妻以康
為謚易名雖私于傳有志先生效之謚曰文懿匪學無
文太君書笥令淑孔彰純懿無累斯名稱情太君罔媿

吁嗟太君亦復何悲某忝戚末猶子比兒總帷瞻拜泣
下漣沔何以誄德表之素旗嗚呼哀哉

黎母魏太君哀辭

皇清誥封淑人黎太姻母魏太君以雍正六年戊申秋
八月三日卒于京邸官舍之內寢嗚呼哀哉令子使君
致遠方以光祿卿持節巡察河工事竣言旋遷大廷尉
忽遭斯變慘痛異常

上眷戀孝子方深不忍聽其遠離又重違孝思特體下

情得自都門奉太君靈櫬旋歸故里由張家灣泛運河
過青齊經魯國踰淮沂江越吳楚豫章以明年己酉之
春至長汀為程百有餘日道旁觀者咸歎歎羨謂賢
母孝子其榮其哀非尋常所能及也同鄉親朋多不遠
百千里重趂弔奠元與令子使君為忘分之交二十餘
年四載京邸蒙太君飲食教誨有逾骨肉復蒙不棄寒
賤締為婚姻自應躬赴靈帷舉觴一慟而元以粵東下
吏孤忠為

國不合時宜慚無見幾之明致投媚嫉之網羈縻于茲
不能一造汀郡趨蹌執紼少盡猶子之情臨風想望涕
零如雨鬱此哀思何能默默四兒雲翼太君之孫壻也
敬遣一行代進三爵乃刑牲設饌陳帛獻楮于庭哀而
奠之曰

嗚呼太君生長西秦代有令德育是掌珍四行備美芳
規絕塵父母鍾愛弗輕薦蘋大參黎公為世偉人適宦
邊疆名動四隣英豪物色願事櫛巾荅箕帚夙夜惟

寅伊時逆藩相率倡亂閩粵滇黔羽書飛箭岌岌關中
鎮臣復叛公時觀察手繫秦甸偕張將軍同心靖變夕
理軍檄朝籌守戰太君佐之罄撤環瑱紉絳征衣三軍
袪絢既平逆賊復軫哀鴻勞來安集中閨更恫賙饑恤
寒疾痛相通民忘兵燹萬井融融感公功德望報羆熊
果邀天眷誕育夔龍少而穎異長則亢宗太君之福與
德偕隆公澹于名急流勇退惟耽詩文林泉不廢濡毫
伸紙太君意會并白親操辛勞罔懈上事尊長下和儕

輩各得歡心馨聞中外令子成名文驚海內望重木天
猶勤教誨遂操玉尺出掌文衡太君教之惟公惟明三
年楚澤兩袖風清海珠靡遺連茹彙征還朝復命司諫
彤庭太君教之惟忠惟誠毋傷刻薄毋涉沽名丰裁凜
凜為國典型

帝念楚邦澤弗下究特簡巡行持斧衣繡太君教之民
依在宥荏苒跡絕風淳俗厚

帝念黃河數省馳驟大利大害往巡弊竇太君教之稽

工察漏兩載安瀾厥功殊懋


天子曰都晉卿光祿治裝未行奉天推轂甫及脂車廷尉掌軸一歲九遷幾將枚卜何期太君遽登仙籙弗念令子拊膺躑躅泣血呼天百身莫贖山川墮淚歸怨亭毒嗚呼哀哉

帝謂孝子國家柱石體爾孝思假爾休息扶輿還鄉治喪祖柩六千里路哀榮嘖嘖大開弔堂兼營窆窆親友趨蹌悲傷痛惻元也不才備官海僻

主恩深重圖報涓滴一念不欺一介不忒塞逢監司狼
貪虎嚇侵欺

天庾命予補塞賠穀三千寒儒何力況復捐金二千一
百毒虐百端如鬼如蜮止合挂冠難堪虺蜴大吏憐予
孤忠拙直調我番禺避茲仇敵謂受憲恩得伸報國其
如怨深橫加霹靂欲快雄心昧良羅織上官有權下吏
當阨幽獨無慚任施鋒鏑可對帝天詎終屈抑悵望靈
幃趨拜未得以斯耿耿涕泗沾臆太君何憾泥金鳳翟

五福備膺恩綸洊錫濟濟孫支邦家圭璧含笑九京榮
華曷極敬遣豚兒千里匍匐奠獻一觴用將悃悃靈其
有知歆然來格嗚呼哀哉



鹿洲初集卷十九

欽定四庫全書

集部
鹿洲初集卷二十

詳校官左中允_臣瑋五珠

助教_臣常循覆勘

總校官進士_臣繆琪

校對官中書_臣張曾效

謄錄監生_臣張鴻恕

欽定四庫全書

鹿洲初集卷二十

廣州府知府藍鼎元撰

行狀 墓志銘 墓表

先王父逸叟先生暨王母陳孺人行狀

先王父逸叟先生諱繼善字逸淑世為閩之漳浦人曾祖處士毅叟公生三子長諱初芬次諱初茂以文學著名先生其季也本名初蕙生于明天啟元年辛酉二月

之七日性好學博通經史及天文地理諸書深沈不露
童年應試屢不得志于有司將北遊取道南粵見時政
日非急走還慨然有高隱之志時族父紫濤公巡按三
楚楚寇張獻忠漸橫撫按治理諸院方羈縻招撫為息
事寧人計先生聞之頓足曰撫獻忠如養虎子終非可
馴及其長大將搏主人食之矣此曹亟誅之尚恐不死
何撫之能為吾叔父其不返也家居官塘鄉湖堦里與
先王母陳孺人謀曰天下將亂此處非避兵之所長谿

山母頂先世故居左右數十里皆吾宗族且深邃在萬
山中無他患當徙宅焉孺人曰善先生往鳩工庀材結
廬甫就中原大亂土賊肆橫孺人負姑逃難遂走入萇
谿山中孺人同邑大坑陳氏女世為宦家素纖弱不能
任重姑黃太君雖老病甚頗碩料孺人弗勝負荷謂曰
吾老且死死于賊與死于家等耳若年少當急逃勿以
戀我受累我死不瞑目也賊且至里婦皆倉皇竄匿孺
人襁負姑行十五里跳澗踰嶺如飛不自知其苦及至

其谿再扶姑不能動族人大笑稱奇以為勇生于孝益孺人平居婦德閭範為宗族所推而孝行尤嘖嘖著聞者也先生既隱居命童傭闢地開山種竹木花果數千樹每當桃紅李白涉趣行吟孺人釀秫為酒舉杯對案相敬如賓教子讀書聲琅琅出金石不復知有人間利祿事矣康熙甲寅三藩繼叛耿精忠傳偽檄郡縣割髮辦示降鄉人恐請先生議之先生曰作亂也不可聽國朝王氣方盛雖十藩亦無如何況耿逆如行尸安能

以兵加我于是鄉人竟不割辦耿逆亦不能來時臺灣
鄭氏聞耿盜兵亦大舉入寇攻擾漳泉偽署吳球為漳
浦縣令駐劄萇谿沿鄉徵糧球聞先生名求一見不可
得直造先生廬先生遁入老虎洞球踞駐先生巖野齋
數月終不得一面嘆息而去先生以虛名太著非自全
之道乃改今名更號逸叟深自晦匿縱讀堪輿書逍遙
山水尋求地脈窮數月不返人莫能測其所之由是先
世隴塋多所自擇若官塘江東霞嶺蓮花諸祖墳其表

著者蓮花山形勢特奇初求之不得則為施姓者購去使人請之價十倍弗可居數年間行油柑嶺見山麓僵屍度遇盜搏而仆者就視之不識何許人氣奄奄未絕先生命僕負以歸延醫調之得不死然傷重弗能行養之月餘盡老酒數石晨夕雞豚如事所親比復初問姓名感泣而去不知其為即奪購蓮花山者也施歸與婦謀無以報再生恩遂獻蓮花山為謝先生厚其直售之以葬我高祖母蓋吉甯云虎朝徑生基今先生安厝之

所亦早年自擇者也先生為人忠厚誠篤寬和澹定平生無一言欺人無憂愁無畏懼無盛怒無與人爭見人有非則從容勸戒橫逆之來亦笑而受之教先君讀書必令為聖賢之學先君幼極博負奇才為多士弁冕名震閩粵學者多宗之先生淡然不以為喜年三十二不祿哀動里閭族戚友朋如壞梁木先生寂然若無所事者不孝孤時方十歲號慟欲絕先生惟令讀書繼父志耳不孝鼎元既稍長為時文頗自負先生曰程朱曾為

時文否鼎元曰非是無由得科名先生曰皋夔尹說皆得科名否鼎元不敢復言既學為古文詞繕以進先生曰此亦近日之空谷足音也道以文傳但為其有用者可耳庚寅秋鼎元著女學一書告成先生閱之大喜謂孺人曰五百年無此矣不意吾孫能如是此有關風教為世道人心不可少之書確乎可傳也蓋先生生平無狂喜惟此舉頗為愜意鼎元由是益黽勉正學後此著述先生俱不及見矣先生年九十始扶杖俄則曳之而

走若忘其為杖者尚喜遊山日行四五十里當道屢欲
見之皆不出及鼎元移家邑城迎就養邑令汪公培祖
行鄉飲酒禮以先生為上賓始一見焉康熙辛卯冬十
月二十有三日覺微疾遽呼孺人曰子夏云君子曰終
小人曰死吾今日其終矣夫孺人曰未嘗疾何至此先
生曰是矣為我喚諸子孫來既咸集笑曰吾平生所為
無一事不可對天日全受全歸更何所憾惟願汝輩勉
為善人而已遂卒孺人治家有禮法閨門之內肅若大

庭方正整齊而不為苛刻至老猶紡績織紵罔憚勤勞
家中上下大小皆化之無敢舍業以嬉者生崇禎元年
戊辰春二月十有三日少先生七歲後先生五年卒則
康熙四十五年丙申冬十一月十有三日也先生享年
計閏九十有四孺人享年計閏九十有二壽考齊眉孫
曾繞膝孟德耀梁伯鸞不足道也子三長諱宗明生孫
鼎欽鼎恭鼎銓鼎錡鼎溥鼎陶六人曾孫雲鵬等十七
人次即先君諱斌生不孝鼎元鼎光二人曾孫雲錦等

十二人又次諱宗哲生孫鼎輔鼎弼鼎藩三人曾孫雲沛等四人女無之孫女七人曾孫女九人聘娶皆名門不具述

先考大菴先生行狀

鼎元生十歲而孤先考行事不甚知其詳惟憶五六齡時最為先考所鍾愛嘗攜與步月中庭從容問曰汝長大作何事業鼎元對曰讀書先考曰汝讀書何為欲為官乎為聖賢乎對曰皆欲之先考曰奢官弗可必也得

不得其權在人聖賢可必也為不為其權在己鼎元曰
吾為之喜曰善他日鼎元問曰人為官不得為聖賢乎
先考曰居官正好為聖賢致君澤民皆聖賢事如伊尹
周公俱是聖賢孔子亦是為官者但官難期必得顏子
閔子不必為官皆聖賢也由是日以聖賢自居先考亦
隨事誘迪之松陰乘涼見小竈負龍而趨抵掌大笑先
考曰非禮勿視汝此一看便不是聖賢非禮勿動汝此
抵掌亦不是聖賢後當戒之鼎元曰諾一日偶拂意跌

地而啼外王母攜之不起固勸之啼愈厲忽先考至佯
為不知者但呼曰今日聖賢何在即躍起急對曰在此
先考笑曰聖賢不哭也拭淚曰無之七歲從外祖入學
讀書先考指所讀示之曰弟子入則孝出則弟汝欲為
聖賢當從此章書做起若不能孝弟便非聖賢為人
謹慎說話不信實便非聖賢遇衆人不能廣愛遇仁人
君子不肯親近有閒暇不肯讀書皆非聖賢汝將此一
書記熟擴充馴致至極處不患不造聖賢地位也先考

時授徒邑中每館旋必令背誦所讀書及十歲五經讀畢則大喜以為可教臨終執鼎元手曰汝無忘為聖賢之志我含笑九原矣是時鼎元正在穉騃所記者如此而已不能狀先君行事後聞之先慈又以問先王父乃得其概先考諱斌字郁人學者稱丈菴先生先王父逸叟公仲子也少聰敏一目數行皆不忘九歲通六經史記左氏傳以能文見稱比長益刻勵晝夜攻苦理學經濟諸子百家以及天地理禮樂律歷韜鈴行陣奇門

演禽星卜諸書靡不講究精微欲以措諸世用雖恂恂
不露圭角實自命為一代理人物云先外祖子興許公物
色當世賢豪士無一可意者見先考與談論驚為偉人
以先慈歸焉先考弱冠補博士弟子員為一庠弁冕自
後屢軼其羣然數奇不遇先王父逸叟公隱者也視世
態如浮雲笑謂曰人生何必科名學聖賢焉足矣汝讀
書太博正程子所謂玩物喪志者宜屏去一切專講求
理學經濟即使不用亦不失為伊川之徒也先考悚然

受命由是專以程朱之學教授生徒而大名太盛漳潮間談文之士多從之若但知先考為丈人者初臺灣未靖閩督姚公啟聖駐漳籌海設修來館以招攜鄭家將士凡歸誠者無真贋皆納之視其才可用實授以官有薦先考于制府者召見太悅將附入歸誠例授官先考辭曰官者吾所欲但不可以欺而得之請仍還清白書生應制舉同邑前輩黃太常公時叅制府軍事以此重先考行誼延禮于家俾族子受業焉其族黃長民先生

與先考友善亦遣子元美來就學元美字越甫人品器識迥異時流為先考高弟受業最專且久觀人論世定事幾成敗當否與先考昭合每喜談先考遺事以為後學式相相得意鬚眉俱動嘗述先考言王仲淹為晉宋隋唐數百年間第一學者無師無友崛起塵濁之際儼然自命為聖人可不謂豪傑之士乎中說大有意思非揚子法言所敢望其萬一使天假之年確乎可入聖人之室也天生此才不予之壽亦獨何哉言訖淒然淚下

越甫意先生懷古情深不料其自知不永年故有感而悲耳先考易簣時謂越甫曰窮達命也修短數也吾無顏子之學適符顏子之壽既用自愧一生懷抱弗得少展不知天之生我何意也豈尚蘊釀以待子孫之發洩耶及卒越甫號慟如壞梁木遠近聞者莫不歔歔痛惜之不孝鼎元幼年失怙追憶音容依稀在目奉持遺訓刻骨鏤胸中夜輾轉涕零惟恐稍自暴棄無以慰吾考于泉臺之下倘天牖其衷略開一隙之明得以望聖賢

門牆而識所從入之方無負先人臨終丁寧之囑是則
不孝鼎元之上願也夫先考生于大清順治十五年戊
戌夏四月二十有六日卒于康熙二十有八年己巳秋
八月十有八日享年三十二歲配吾母節孝許太君自
有狀子二長不孝鼎元雍正癸卯科選拔內閣一統志
館纂修

特授廣東潮州府普寧縣知縣娶許氏先慈姪女次鼎
光南灣鎮標外委隨征守備娶陳氏女三長適癸卯科

聯捷進士吏部候選知縣李杜次適戴承恩三適林宗
岳俱先慈出孫十人雲錦福建水師提標功加都司僉
書娶林氏浙江定海鎮總兵官諱亮女雲龍業儒娶林
氏甘肅巡撫贈尚書諱日瑞公曾孫痒生諱從龍女雲
翔未聘雲翼聘黎氏已丑進士奉天府尹兼盛京刑部
侍郎諱致遠女雲鶚雲燦俱幼未聘俱不孝鼎元出雲
樞雲路雲槐雲衢俱幼未聘不孝鼎光出女孫三長適
都司僉書江諱蓋臣子沛然次幼未許配俱鼎元出又

次幼未許配鼎光出曾孫成德幼未聘雲錦出成功幼未聘雲龍出餘未艾

先慈節孝許太孺人行狀

先慈姓許氏邑西郊景文里人外王父諱世昌公明太僕寺卿諱祚昌公介弟也博學好古遭亂不仕先慈生有異徵外王父最鍾愛之授以書過目成誦稍長通載籍嫻吟咏嘗賦落梅詩有銀鱗香大地鐵骨鬬寒風之句識者已占其兆矣然片紙隻字未嘗留稿曰閨中字

跡不欲令人見也年十四絕不復吟善女工外王父益
奇之而是時先君年少行卓才名聞遠近外王父造廬
相訪驚為偉人遂締焉先君家世讀書不治生業及先
慈于歸去華飾鬢粧奩食貧作苦以供孝養善承翁姑
意飲食衣服起居不待詔告動中竅會相先君經理內
外俾得專志讀書孳孳以遠大相勗閨門之中若師友
焉歲己巳先君染寒疾秋八月六日病篤謂先慈曰勢
不可為矣若當奈何對曰相從地下無他說也先君愀

然曰雙白在堂不克盡子道死難瞑目翁姑之愛若實
甚若死益傷翁姑心是重余不孝罪也言訖氣絕先慈
拊膺大慟昏仆移時不甦進湯藥不得入口外王父以
刀尖格先慈齒灌之夜半先君復蘇顧先慈曰吾未死
若先死耶若執性如此何以慰吾魂于泉下須臾先慈
亦蘇與先君從容議後事甚悉越十有八日雞初鳴度
先君不能至旦更問所欲言先君瞪目視之曰上事舅
姑下撫兒女前言已盡願毋我違遂卒先慈哀毀如禮

尚刻刻有殉亡志喪畢之日閉戶自經大母率家人擠戶救之乃免先王父泣而詔之曰若立志死節是也吾夫婦老矣兒死遺以二孤若在尚冀成立也若復死誰當撫之且吾兒臨終與若作何言語息壤在彼而忍忘之耶先慈矍然垂淚曰兒今不死矣時年二十有九也不孝鼎元鼎光方慟然惟瓜果是利諸妹終日呱呱厨無宿舂先慈以女工經營家計市番薯給饗殮種蔬為糜以佐不逮時或具甘脆承舅姑歡心親教督不孝兄

弟講授詩書反復開導終日不厭夜則篝燈自課女工
于旁視不孝倦或思睡則縷縷述先君遺事以感動之
且勗以立身成名繼述顯揚之大不孝鼎元或不率教
先慈不忍加箠楚但涕泣責讓不食鼎元因憂懼不知
所為急引咎請改乃許之由是稍有警悟始不敢不讀
書雖隆寒盛暑苦雨淒風機響書聲永夕互答道路聞
之無不傷心流涕者癸未秋鼎元受知邑大尹今廷尉
四明陳公以五經冠童子試先慈頗有喜色復誠之曰

汝無萌幸心此不足當毫髮數也吾所喜者陳公有知
人之鑑為所賞識將來學問或可有成汝必勉之冬鼎
元受知學使者今內閣學士歸安沈公且命隨軺車校
士先慈復馳書誡曰沈公當代大賢所取閩士千數汝
獨見器重如此亦謂汝自幼孤苦當激昂自奮勵欲朝
夕左右俾至大成此千載知己也勉之光陰如駛學業
無疆暇則詳審世務留心經濟毋長傲偷安吾之望也
丙戌夏沈公憫先慈清操苦節欲特疏題旌以年方四

十六未合例手書霜貞衍慶四大字旌獎鄉人榮之未
幾大中丞張公撫閩漳紳士僉採先慈節孝事實請于
中丞公而郡刺史山陰趙公邑大尹悔菴汪公掌教蔡
公及通庠人士左右鄰里皆以先慈節孝可風合懇旌
獎各加美詞申詳其事張公躍之是時先慈年四十八
猶未合題請例張公因檄郡守鏤飾節孝流芳匾額邑
大尹汪公親具彩幣設鼓樂牽羊舁酒到宅褒旌先慈
撫匾愀然曰節之一字足矣孝豈敢當且家素貧不能

備養翁姑耄耄之年弗飽雞豚之奉念之傷心今妄得
美名徒增罪戾無益也先慈念王父衰老常憂懼不自
安望不孝鼎元成名甚切每誦歐公言祭而豐不如養
之薄二語鼎元流汗沾背及秋闈被刑念無以慰老親
先慈則又寬之曰人生科名不宜太早再加數年之功
造物厚意也其鬱深者施必暢其積久者發必弘顯達
之驟聲問易減增益不能大器乃成不孝因復黽勉淬
勵又屢以貧困不能家食飄泊風塵歸囊偶有所得必

問所由曰寧可清饑不可濁飽蓋恐或從非道來也辛
卯冬十月王父棄諸孤先慈哀傷過憊得嘔血疾然旋
起旋止亦不為意事王母益辛勤癸巳春不孝鼎元將
應恩科省試先慈欣然謂之曰昔汝父臨終謂汝必能
有立今蹉跎二十餘載矣大母年高望之甚切勉之是
時先慈起居無恙言笑甚懽不孝鼎元亦遂安意就道
嗚呼孰謂臨別丁寧之語即為不孝與母永訣之日哉
暮春落第策蹇將歸以大中丞覺羅滿公再三慰諭留

省讀書重違長者命而不孝鼎光音問往來亦不云先慈有所患苦中秋後四日忽接八月五日家信云先慈疾氣大作勢且危不孝鼎元始憂懼急辭回家二十八日過海澄則聞初六日之訃嗚呼痛哉不孝鼎元終年飄泊情事未伸生不能備奉養殮不及憑棺衾天地罪人抱恨何極雖曰覩然人面曾羊烏報本之不如矣自先君沒後距今二十五年先慈千辛百苦莫可名狀近來喘息甫定方私幸來日正長庶幾得徼天之佑少報

罔極於萬一嗚呼孰謂其竟如此而已耶洒血問天我
罪伊何即使苦塊餘生或得藉先人餘慶大烹列鼎以
享以祀亦無補于終天之恨矣嗚呼痛哉先慈平生恭
慎治家不嚴而整待妯娌大小咸得歡心對女婦終日
寬和無疾言戾色早年極懦弱及撫孤井臼操作媿媿
弗倦自奉極不堪而祭祀必豐潔賓客往來極力供奉
親戚有困乏者分所有周之鄰婦或以為言則曰我家
常在苦中亦不爭此區區者也二十年未嘗為疾所苦

自辛卯歲一染血症隨亦平復今秋八月朔痰氣始盛覺寢不安席然猶整頓家中器具及小大敝衣躬自補綴之越五日知不起乃命馳書之三山召不孝鼎元及暮正襟危坐與舅氏霞山公談家事甚悉夜二鼓鼎元婦許氏侍旁先慈低聲謂之曰吾自而翁沒後常刻刻欲殉亡為子女所累延我二十五載今吾事已成將報而翁于地下矣不孝婦慟哭曰祖母年老遊子未歸願少遲之先慈握手曰不能待矣問遺囑則曰元兒能理

會無俟吾言時不孝鼎光及舅氏霞山公暨諸男女幼孫俱至側先慈一一注目視之遂終則難已鳴矣是為八月六日也嗚呼先慈性情寬厚舉止端莊無一毫局促之氣半生苦節不克食報于厥躬固已痛矣又不能姑待數日使不孝鼎元得親醫藥含歛悠悠蒼天此恨何窮期耶天道而無知則已天道而有知其以此報施先慈乎哉先慈生于順治十八年辛丑二月二十五日巳時卒于康熙五十二年癸巳八月初六日寅時享年

五十有三配先考文菴公子孫名字具載先考狀中不復贅

李求可墓誌銘

憶余辛卯秋讀寒支集為元仲先生立傳時向汀友問檀河後人寧化陰君琫素為余言先生令子求可公有父風閉戶讀父書屏迹城市心韙之丙申遊汀偕琫素之泉上始得見求可公時公年六十有七老矣翼日余登茶窠山拜李先生墓公命子琳牲暨諸孫從離檀河

可里許樹木鬱蒼山岡環抱天然一安樂窩墳前構饗
堂數椽頗幽雅蔬畦曲沼皆潔淨有致余顧謂琇素曰
求可公之葬其親也能子矣琇素曰公天性至孝事先
生極盡子道嫡母邱孺人病且死委頓床席者累月衣
襦數澣公以手承其惡藥餌必親不假婢僕是墳先葬
白沙坳族人所贈先生壽域者有水患公乃改葬此經
營布置極苦心焉余徘徊睇審不忍去左臂有墳昂然
稍異趨視所鐫石大驚曰嗚呼此吾故友上杭劉先生

鰲石也曷越五百里而來葬于茲再拜畢與琤素諸君
席地坐始知劉之尊人嘗師事李先生劉尤為先生所
器重癸巳五月五日客檀河病篤求可公舁諸家中為
易簀以沒衣衾棺槨皆公所備欲自用者復遣使周其
孤嫠葬之先生墓側春秋祭掃如禮余為劉痛心潛焉
淚落感公古道高義謂真不媿李先生子也琤素曰公
見義無不為恐恐然慮弗克繼父志四方遊客及君子
之至于斯者必誠敬歎留致其歡以去去則酌人品高

下遠近量餽以贐一如先生在時父執交遊有晚景不
如意者尤慙懃遣使問遺不倦楚人劉某遭亂為兵所
掠父子祖孫離散者久之友人述其事公拮据多方幹
旋俾其骨肉復聚未嘗有德色至于待宗族解紛難處
兄弟著友恭據苦辭甘推財讓產又公平日尋常事令
名籍籍里黨間以為必有後福者琳姓曰家君言為德
非以倖福併非以邀譽也但行吾心之所安與力所得
為而已余曰嗟乎此有道君子之言世人安得聞之日

將晡偕諸君下山歸目覩檀河精舍琴書卷軸花石亭池皆守先生之舊有增新無廢失家廟土堡廬井橋梁先生所建置者咸井然不墜余益嘆公為能子而公悽然以悲謂丁亥冬不戒于火土堡所藏書籍器物頓盡先人手澤灰燼傷心余以先生生平心血全在著述公既次第登棗梨傳播海內他長物何足繫懷信宿公家公之仲孫倓以所為文相質余嘉倓之為令器且喜公之子若孫皆不類尋常也盡歡而別已亥嘉平復會琇

素于粵中則言公已沒甚痛之念茲哲人有禪風化思
著其美以勵頽俗而琳甡奉公遺命以庚子秋七月攜
公狀造余屬為文以志其墓嗚呼余安敢辭而安忍辭
哉公諱向旻字允懷後更名子權字求可世居寧化之
泉上父前朝徵君諱世熊即元仲先生生子三人公其
季也幼力學諸子百家皆研究稍長隨先生遊豫章泛
鄱湖登匡廬五老諸峯謁天下遺逸名宿咸以國士期
之弱冠補弟子員戊午以貢入國雍例當授職辭不就

其生平大致如此諸懿行芳規未易更僕鄉之人能道之余特就丙申所目見耳聞于公生前最確者叙述其事而其餘槩從闕焉不欲多為諛詞傳信也公生于順治庚寅九月三日卒于康熙己亥八月朔日俱亥時享年七十元配邱氏年六十四先卒側室陳氏子三人長琳姓邱出也娶于母族次是恒娶張氏次葆光聘張氏陳出也女七人長適陰承天邱出次適陰承德即琤素長男也次適邱夢陽次適將樂伍其元次適歸化馮廷

楷次許字清流雷超士次許字清流鄧登龍俱陳出孫
五人佺娶陰氏佺娶楊氏佺聘張氏佺聘邱氏俱琳姓
出儻幼未聘是恒出孫女四人一適伊肇炳一適張豐
一適歸化葉國撫一適清流王雲鳳俱琳姓出曾孫三
人長學長璧佺出長榮佺出曾孫女四人佺出者二一
未字一許字清流曾聯芳佺出者二一許字將樂伍開
天一未字某年某月某日奉公柩葬于某里曾坑山坐
某向某銘曰

檀河水清且漣彼君子兮能承先孝友道義無欠闕曾
坑抔土隴岡阡昌厥後非偶然

誥贈奉政大夫夢巖戴君墓誌銘

代

先民有言窮達命也出處時也時命在天君子聽之苟
有心于世道安往不可以濟人利物勵詩書立志節敦
氣誼挽頽風皆儒者素位而行之學必拘拘身致通顯
而後有所表見陋矣余曩歲撫綏兩浙以天台戴令有
異政升諸朝今厯郎官攜厥考夢巖君行狀涕泣請余

銘其安因乃子而知其父之賢亦余所樂為誌者按狀
君諱某字夢巖江左建平人少孤力學弱冠坐皋比教
授其鄉之俊髦多所成就而君顧數奇困童子試者久
之逾三十始補博士弟子員省試又數報罷慕范文正
公作秀才時以天下為己任留心康濟講求民生利病
上書陳言佐當道所不及鄉之人咸嘉賴焉先是建平
正賦外多雜派有所謂兵豆米者苛苦尤甚君條陳制
府檄清釐得豁免民困以蘇又建邑土產皆私米而功

令徵白糧民貿遷他境以輸苦煩費亦以君條陳入告
得請改徵本色秬米又學圃為豪民兼併數十年莫過
問君昌言於官遂復之君既以文章意氣名一時士無
論知與不知皆浩然歸重邑令李君蓼匪尤忻異之延
為子師君早暮談經術不預外事李益服其品高以為
時賢莫及也李浙人以遷去不通音問者二十年而李
物故久家亦零落其子以仇陷縲紲乘守者懈忽颺去
念浙東西皆法吏所及莫能容間道走君家亦不為君

言其故君遇之甚厚未浹月以病死循無歸我殯之義
棺余含殮如禮令已子制總麻友生之服朝夕哭奠走
一介訃其家而其家孥孺親黨已皆被攝錮獄蹤跡李
生去向及使至則遣吏隨之啟棺驗曰是也然幾以逋
逃藪及君大吏聞君言始嘆服君因厝其柩先兆側歲
時祭掃如私親十餘年乃召其子資之扶櫬歸吳越間
嘖嘖君高義而君居鄉多隱德不欲人知人亦莫能盡
知也有陳某者負君券累累復以官逋急將鬻子婦以

償君惻然召之至出故券毀之且贈數金輸官逋陳感泣率子婦羅拜君所君引避無德色他行事多此類云君事兄如父恤宗黨重然諾嚴取與敦本尚實無浮華刻薄之氣使得志于時當卓然有所樹立乃時命迍邐五十始餽于庠七十以明經老一生不得持民社尺寸之柄亦獨何哉然君也素位而行濟人利物之心不徒空托之懷抱固亦有足多矣修德獲福之談儒者所不道而或者又有不于其身于其子孫之說吾以君之子

某驗之始信理有不誣乎君生于云乃為之銘銘曰
珠韞匱玉在璞身雖隱矣道自足問汝佳城惟茲吉卜
氤氲精氣見山川子子孫孫世式穀

寧化文學翠菴王公墓誌銘

寧化翠菴王公將葬乃子鷺以書來京師請余誌其墓
余與鷺為同年友于公有通家猶子之誼況吾鄉名卿
偉士肩相摩而鷺弗之請獨不遠六千里以屬余余安
敢辭公姓王氏諱如綸字右箴號翠菴系出宋丞相文

正公之後有評事君者從南渡轉徙入閩居寧化之龍上里久而蕃衍名其地曰王坊世力田為家法迄明中葉而義菴公饒于財好施予捐千石賑饑直指使者旌其義以鄉飲酒禮賓之五傳至二魯公有隱德則公之父也公幼聰明讀書必求根柢識者知其與俗學異矣通經史旁及諸子百家髫年應童子試署郡守盧公異其才拔冠一軍旋受知學使山陽陸公補博士弟子員試輒高等盧遷辰州守邀楚遊敦趣再三許厚贈公以

二親且老不忍離晨昏固辭弗就時人以廉孝目之公
讀書立品不事干謁性嚴毅無所阿丰采為鄉邦所畏
愛甲寅藩變毒巨室索餉狼戾羅公父于獄公涕泣請
以身代不可固請乃可晝夜坐縲紲極苦楚至皮骨僅
存不能堪公方以脫父為幸安之不悔也及事平家亦
零落然所保全者大矣公之孝如此勇又如此不以禍
難怵其志不以利欲動其心有學有品實足風勵一世
蘭生幽谷不為王者之香惜夫今

天子重孝廉方正之士徵詣京師量其能而授之職使
公如在綰綬在所必先其如命之不逢何哉然讀書自
樂老而彌篤教子孫能傳其家學視徼幸得志于一時
不為人所稱道者又個個乎遠也公生于云云以某年
某月某日葬于龍下里察選午山子向兼丁癸堪輿家
謂其地形為荷葉蓋金龜云銘曰

生龍上葬龍下翠華朝察選夜扃汝窆安汝舍荷葉青
青出清連國寶家藏重聲價子孫世守天庥迓

太學仲謨周公墓誌銘代

公諱天榮字仲謨姓周氏福建海澄人系出唐開漳進士周匡物自高曾以來世有聞望族祖起元前明大中丞精忠亮節忤權閹魏忠賢以死公生而穎異童孺若成人父景文最鍾愛以大器期之不幸早失怙恃遭兵燹弗得卒舉子業以太學生老耄竟所懷族人悼焉某獨喟然而嘆曰躬有天爵足以榮其身行推孝友能為政于家全受全歸毀傷無憾何不足之有哉緬思在昔

海氛不靖公兄弟轉徙流離季遭寇掠公與伯兄踪跡
十餘年乃得之而季已歿僅存遺孤一人捐重貲贖以
歸此則公之友也喪亂既平祖廟傾圯公協謀更新捐
貲襄事輪奐巍然又置祭田若干畝俾世世子孫皆奉
烝嘗以無忘祖父此則公之孝也性渾厚無虛夸狙詐
之習見義必為聞諸子讀書聲輒油然以喜好親近名
公鉅儒極力延致為兒曹矜式孟子曰有天爵者仁義
忠信樂善不倦惟公有焉孔子曰惟孝友于兄弟施于

有政是亦為政公又有焉公享年五十有八順治乙未
康熙壬辰公生卒之歲也七月廿二四月廿三公生卒
之月日也辰公生卒之時也待封孺人林氏公之元配
也丈夫子七人曰歲貢生楸曰正健曰樸曰相曰柱曰
櫟曰橋孫一人曰泌女子二人外孫男女四人公之嗣
續也九疇五福曰壽曰富曰康寧曰攸好德曰考終命
如公其庶乎世之居高位縻厚祿事業無所表見沒世
而名不稱者其視公何如哉公卒之七年戊戌其長子

楸將以某月某日葬公于郡北茶園先期請誌銘京邸某公之族弟也義不容辭故為書其事于石銘曰

丹霞城北有茶園從今以後植芳蘭坐丁向癸兼未丑仲謨塋域在此間相戒松楸勿翦伐子孫世守磐石安陰醒菴墓表

寧化為邑介汀邵萬山之中奇峯嶽岑清溪溜瀝地多隱君子自李元仲先生翹然傑出一時風教潛移有志之士砥行修身好行其德厚彝倫而薄財利勤學問而


淡功名巋然以古道自處不為末世浮囂之習如陰氏
醒菴先生尤其矯矯彰著者先生性孝友能篤于親三
歲而孤母雷孺人撫之先生感念先德勝其齋曰烏夜
刻苦自勵及居母喪哀毀三年不御酒肉遇先人忌辰
歲時伏臘展像跪拜淚涔涔下以父柩未葬徒步千里
走江西造豐城訪形家楊震延以歸既得吉拮据襄事
凡先世塋壠無不修祭祀無不舉昆弟戚屬無不存卹
今先生雖沒而其孝友雍睦嘖嘖里黨間尚有稱其分

產從弟推愛堂姪及撫謝氏孤成立故事則先生之天性可知矣先生為諸生者二十餘年為太學生者三十餘年中間棘闈數蹶連不得志于有司澹然不以為意孜孜好學老而彌篤當甲寅閏變偽帥索餉狼籍毒流薦紳先生為從兄株連滯獄半載一時同患諸人俱相對號泣悲不自勝先生讀書獄中晨夕不倦聲朗朗若出金石手抄較錄一如無事非其涵養精深置死生于度外而何以能此先生素簡樸寡嗜欲不喜聲伎嘗衣

大布衣方領闊袖古貌岸然舉止言動悉中規矩繩墨
望而知為有道者間從賓客飲他人酒酣耳熱謔浪歡
呼先生正襟危坐終席無惰容後生小子或目之為迂
先生弗顧也見人有過必面折不少假借人亦諒之閒
居無事洒掃庭除蒔花澆竹娓娓然若有甚樂于中者
課兒曹讀書立品無墜家聲嘗曰吾見世人刻薄殊甚
每因財利而傷同氣吾甚痛心焉吾願後日子孫切不
可蹈此轍又曰待人接物須之以平恕遇事以知足忍

耐為主嗚呼先生此言真李世之藥石也使先生得志于時出其言坊行表維末俗而挽頽風豈不足為天下矜式奈何窮山僻處獨嗟肥遁蓋亦有不幸焉者乎歐陽公曰為善者能有後而託于文字者可以無窮先生子若孫克自振拔所以慰先生者方興未艾而長君琇素不遠千餘里跋涉山谿持行狀徵言于小子故敢不揣固陋為之表以揭于其阡俾寧之人士有所觀感焉先生諱卿月字省孺醒菴其號也太學生老享年七

十五歲生歿年月子孫名字具載墓誌中不復贅



鹿洲初集卷二十